

易

通

釋

易通釋卷十一

駢菰樓易
學之三

江都焦循學

初筮 原筮

循按蒙彖云初筮告再三瀆既濟彖云初吉終亂此
初字最易與初九初六之初相溷蒙傳云初筮告以
剛中也既濟傳云初吉柔得中也此初在中則指二
五之先行而言睽六三无初有終傳云遇剛也巽九
五无初有終傳云位正中也皆指五言甚明筮以變
言初筮者二五先初四三上而變也故初吉初四先
行二五後於初四則不爲初而爲再初四先行三上

又先行二五既後於初四又後於三上則不爲初而爲三至於三則成泰而後二之五故終亂此初對再三言之與初九初六對二三四五上言之者不同也比彖云原筮原卽周禮原蠶之原原之言再也比通大有大有二之五是爲初筮及其成屯也通於鼎鼎二之五則爲再筮初筮而下應之成屯爲元亨再筮而上應之成既濟爲元永貞凡一卦必經初筮再筮而後終則元亨利貞四德俱全而終則有始原筮卽繫辭傳所云原始一始再始乃爲乾乾不已一始而終則盈不可久故原始要終以爲質也乾二之坤五

初筮也。下應成家人屯。屯三之家人上而終。一始而終也。家人反爲解。解二之五原筮。而後家人上要於解三而終。屯反爲鼎。鼎二之五原筮。而後屯三要於鼎上而終。故原始要終。又爲原始反終。在鼎解視乾。坤則乾坤爲初筮。鼎解爲原筮。而鼎解成咸。咸反爲損。又以鼎成遯。解成萃爲初筮。損二之五爲原筮。損二之五而後咸。四之初而終。亦原始反終也。經於蒙比兩卦。明示其例如此。原筮之爲再筮。與再三瀆之再不同。再三之再。失道之再也。原筮之再。趣時之再也。失道之再。不能體元。趣時之再。元而又元。繫辭傳

云其初難知其上易知初上並舉下云二與四同功三與五同功則初指初九初六之初語各有當雖散見各條復明於此

丈人 丈夫

循按師彖稱丈人吉隨六二稱失丈夫六三稱係丈夫隨之丈夫謂歸妹二之五成隨師之丈人謂師二之五成比師二之五爲乾二之坤五之比例亦爲離五之坎二之比例歸妹二之五爲巽二之震五之比例亦爲艮五之兌二之比例丈者長也見大戴禮記本命篇於此兩卦稱文明體仁長人謂八卦之二五也崔憬引子

夏傳作大人李鼎祚用以斥作丈之非未知易義矣
牝馬 牝牛

循按坤利牝馬之貞離畜牝牛吉用兩牝字爲脈絡
牝陰也柔也坤成屯通於鼎鼎五柔牝也成遯上乾
馬也牝馬猶云牝而馬離成家人通於解解五柔牝
也成萃下坤牛也牝牛猶云牝而牛一明屯之通鼎
坤成屯如是坎成屯亦如是一明家人之通解離成
家人如是乾成家人亦如是易每以一字之同互明
之此其例也推之乾離成革革通蒙蒙五柔牝也成
觀下坤亦牛也革之黃牛卽此牛矣坤坎成蹇蹇通

睽睽五柔牝也。成无妄上乾亦馬也。睽之喪馬自復卽此馬矣。

虎變 虎視 虎尾

循按虎之象不見說卦傳。京房謂坤爲虎。荆馬融謂兌爲虎。虞仲翔斥馬爲俗儒。而本京氏說。宋衷侯果用馬說。九家又謂艮爲虎。言人人殊矣。凡取象之義說卦傳備之。其有說卦傳所不言。或可比例而得。或已見彖象文言等傳。則一隅之反。聖人固不必盡其言。學者參考之。躍如也。說卦傳不言虎。而言震爲龍。不言雲。而言巽爲風。乃於屯稱雲雷屯。於需稱雲上。

于天坎之爲雲不必更詳於說卦傳矣。文言傳云同聲相應同氣相求水流溼火就燥雲從龍風從虎同聲相應謂乾成家人坤成屯同氣相求謂乾成革坤成蹇蹇水流溼謂乾二四之坤成屯承同聲而言水坎也溼下也泥塗沮洳之地震爲大塗是也乾二流於坤五而四應之成屯是爲水流溼火就燥謂坤五三之乾成革承同氣而言火離也燥爲秋金之氣兌是也坤五就於乾二而三求之成革是爲火就燥此言乾坤之當位行也。若不當位有溼而無水則乾四之坤初成復有燥而無火則坤三之乾上成夬復變

通於姤。姤二之復。五成屯。復下震。先有龍。成屯則上
有坎。雲以從之。故雲從龍。夬變通於剝。夬二之剝。五
成觀。剝下先有坤爲虎。成觀則上爲巽。風以從之。故
風從虎。以傳文通之。坤之爲虎是也。淮南天文訓。虎
嘯而谷風至。高誘注云。虎土物也。坤土也。高氏亦本
易之遺訓。與夬二之剝。五爲蒙。二之五之比例。革九
五。大人虎變。大人卽利。見大人之大人。乾成家人。飛
龍在天。則通解爲利。見大人。坤成屯。見龍在田。則通
鼎爲利。見大人。乾成革。通蒙。亦爲利。見大人可知。此
大人卽謂乾成革。通於蒙。惟變通於蒙。蒙二之五。故

爲虎變。剝下先有坤而後巽從之。蒙下無坤。因變而爲坤。虎巽風。傳云風從虎。所以贊大人。虎變見成革。成夬。其能變同也。知其爲夬。二之剝五者。則頤履兩卦。明言之。頤六四。虎視眈眈。其欲逐逐。夬二不之剝五。而夬四之剝初。剝成頤。剝下坤。虎也。上不以風從而夬成需。四互離爲目。故爲虎視。眈眈爲下視。需四之目。下視頤初。故爲眈眈。馬融虞翻皆云眈眈下視貌。夬四之剝初。爲晉四之初之比例。在晉則需二之晉五。卽窒其欲。下視成頤。則必變通於大過。大過二之頤五。乃有以窒其欲。故逐逐。逐逐猶悠悠。言其遠也。荀爽作悠悠。劉氏云遠也。溯其

所以遠則由虎視眈眈而未風從虎也。夬二不之剝五而剝上之三，成謙剝下坤虎也。上不以風從而以上之三爲尾，故爲虎尾。坤虎在上而五無人，是噬人也。惟舍夬而變通於履，雖爲虎尾，得履以制之，故履虎尾。虎尾指謙履虎尾，謂以履孚謙也。以履二之謙五五有人，故不噬人。亨六三履虎尾，噬人何也？謂履二不之謙五而上之三也。謙雖孚於履而履仍成夬，則虎尾仍是虎尾。噬人仍是噬人，所以凶也。九四履虎尾，愬愬終吉，何也？此卽發明彖之履虎尾也。履二之謙五四從之，四多懼，故愬愬。謙君子有終，故終吉。

也。履謙相錯爲臨遯。遯之尾卽謙之虎尾。遯上之臨三爲履上之三之比例。卽乾上之坤三之比例。遯成咸。臨成泰。泰咸相錯。正是夬謙。故初六遯尾厲。勿用有攸往。遯無坤。故但稱尾而不稱虎。勿用有攸往者。臨成泰。遯成咸。卽宜變通。不知變通於損以窒其欲。而以四之初則災矣。咸四之初成旣濟。與泰相錯爲需。猶夬四之謙初。已尾而又需之。是濡其尾。旣濟未濟。初爻皆言濡其尾。是也。於是夬九三獨行遇雨。若濡有愠。无咎。夬二之剝五。風從虎矣。夬二不之剝五。而四之謙初。不爲風從虎。而爲濡其尾。用一濡字。與

遯尾虎尾相貫知濡其尾卽此濡卽此尾矣。

射雉 射隼 射鮒

循按說卦傳云水火不相射水火指旣濟旣濟六爻皆定不相往來故不相射射者由此及彼之謂以矢準之亦指三上也旅六五射雉離爲雉節二先之旅五成屯而後旅上之節三則節成旣濟旣濟下離爲雉是爲射雉若節二不之旅五則旅上射節三節成需下無離卽不爲射雉矣知雉指節成旣濟下離者以鼎雉膏準之也鼎二之五而後上之屯三爲節二之旅五而後旅上之節三之比例互勘之甚明解上

六公用射隼于高墉之上井九二井谷射鴈可由是
推得之虞仲翔謂離爲隼巽爲鴈徒以隼爲鳥鴈爲
魚耳乃不言魚而言鴈不言鳥而言隼則有精義焉
繫辭傳云隼者禽也弓矢者器也射之者人也以禽
贊隼則與恒九四田无禽相貫解成恒則无禽解二
先之五則有禽說卦傳言雷風相薄又云雷風不相
悖明以相薄爲不相悖矣而贊解之上六卽云公用
射隼以解悖也解悖則不相悖是射隼卽猶雷風相
薄解二之五而後家人上之解三爲恒二之五而後
益上之三之比例也春官司常鳥隼曰旃爾雅錯革

鳥曰旗是隼爲革鳥革急疾也故毛詩箋以隼爲急疾之鳥解成咸四不之初則疾咸既濟相錯爲革取隼正取其爲革爲疾解二先之五成萃與家人相錯爲革然後三射於家人上是爲射隼于高墉之上也巽爲鮒無明文卽巽爲魚亦無明文蓋以東方其蟲鱗禮記月令淮南時則魚爲木精論衡指瑞篇故傳會於巽非易義也姤二之復五生於坎水之中故包有魚姤二不之復五則包无魚惟有水乃有魚剝之貫魚亦以其成蹇而有也井九二承初六井泥不食舊井无禽井泥則井成需无禽則豐成明夷井成需則窮故云井谷谷之

言窮也

毛詩進退維谷傳云谷窮也

既成需則宜通晉射鮒謂需二之

晉五而後晉上射三也其稱鮒者鮒爲附之假借兌爲附決需二之晉五而晉上之三應之成咸上成兌取義於附故云射鮒若需二不之晉五則晉上射三不成咸上無兌卽無鮒則不得爲射鮒也試以傳云无與也核之與指咸井成蹇噬嗑成革相錯爲咸則有與因下漏以致窮而无與因无與改而射鮒則晉成咸仍爲有與卽爲兌之附決核傳中與字而鮒字之假借始明古人制器命名每假借以爲之義如棗取於早起栗取於戰慄

白虎通

簪并用桑虞主用桑皆取

於喪

士喪禮注
公羊傳注

少皞以鳥名官五鳩取其鳩民五雉取

其夷民九扈取其扈民無淫扈卽戶戶止也鳩之言

聚也矧之借也雉之爲夷卽雉之爲矢也彼實有所

指尙以假借爲義况易辭之引申乎吾以鶴爲確鮒

爲附豹爲約或以穿鑿疑之略舉此數端以爲證

由豫

由頤

循按由之訓爲自由頤猶云自養也玩下云厲吉利
涉大川可知其義大過成旣濟頤成益是大過已得
所養而頤上之涉大川尙無所養必通於恆恆二之
五自求口實益上乃吉是時乃可涉大川由頤之由

卽自求口實之自。豫九四由豫謂小畜二之豫五也。豫亦成咸。所謂自我西郊。由豫之由卽自我西郊之自。兩由字釋彖中兩自字。一言於九四一言於上九。明初四三上之行必由於二五。恒二不之五則益之涉大川無所由無所由則不可求矣。小畜二不之豫五則不能大有得而簪之盍無所由矣。朋盍簪卽密雲不雨大有得之所由卽不雨之所自也。涉大川卽求口實大有慶之所由卽口實之所自也。凡經稱自者十。需六四比六二小畜彖初九泰上六大有上九頤彖睽初九夬彖姤九五小過六五皆與由同義。需于血出自穴。晉四之初由於需二先之晉五也。比之自

內大有成家人由家人變通而貞吉故自內也睽二
先之五爲勿逐自復大有二之五上乾爲天而後上
之比三是爲自天祐之姤二之復五而後上之復三
所自在復五而云自天者謂姤四不之初而二之復
五也若姤二之復五而四亦之初成家人則上之之
復三也爲無所自矣惟姤成遯遯上有天而上乃得
而自之上之隕雖自復五成屯實由姤不成家人也
成家人則二五已爲初四所自不得又爲三上所自
也夬二先之剝五爲告自邑泰孚否而二先之五爲
自邑告命小畜二先之豫五爲復自道大有二先之

五而比初從之成家人故比之自內傳云不自失也若大有二不之五而四之比初則不成家人爲失其所自大有二不之五而四之比初爲乾二不之坤五而四之坤初之比例在大有成大畜在乾成小畜小畜復自道仍成家人與比之自內同故小畜九二傳云牽復在中亦不自失也承比之自內言故亦之

甘節 甘臨

循按節九五甘節吉往有尙傳云甘節之吉居位中也謂二之旅五也二之旅五節成屯旅成遯旣成遯則旁通於臨臨六二甘臨无攸利傳云甘臨位不當

也。甘節則吉。甘臨則无攸利者。傳已贊明之苦之義。爲窮爲毒。兌成節。艮成賁。不能趣時。致賁上之節。三成需明夷。是爲苦也。甘者苦之反。節能變通於旅。則化苦爲甘。故甘節吉。乃節二之旅。五成遯。遯上宜之節。三若不之節。三而之臨。三則不爲甘節。而爲甘臨。蓋遯通臨。不得以節二之旅。五之甘。用爲遯上之臨。三之應。遯上宜應臨五。臨三不得應旅五。故无攸利。用一甘字。爲遯之樞紐。甘施於節。則不當施於臨也。

頻復 頻巽

循按復六三。頻復厲无咎。巽九三。頻巽吝。以兩頻字。

相鉤貫傳以志窮贊頻巽巽何以窮以二不之震五而初之震四震成復巽成小畜也復小畜不能无咎惟復通於姤姤二之復五因而姤上之復三是爲頻復頻復則厲而无咎乃溯其由巽之志窮而變化轉移以至於頻復始以窮而有咎終以厲而无咎自復通姤爲无咎自巽二不之震五言之則爲吝故巽九三頻巽吝頻字卽指頻復頻復之吝在巽頻巽之无咎在復於頻復稱无咎於頻巽稱吝以互相發明而以一頻字爲樞紐此經文之造微也

冥豫 冥升

循按冥之義同於幽

文

亦同於迷

虞仲翔云坤冥故迷

坤先迷失

道謂三四先於二五也乾二不之坤五而四之坤初

乾成小畜坤成復小畜上又之復三成明夷則迷復

故小畜必通於豫復必通於姤若小畜二不之豫五

而豫四之初則仍是復小畜上又之豫三仍是小畜

上之復三成明夷故爲冥豫冥豫猶迷復也復姤相

錯爲升无妄故於升上六稱冥升與冥豫互明升二

之五爲姤二之復五之比例升二不之五而无妄四

之升初卽爲姤二不之復五而姤四之初之比例升

之冥猶姤之冥也

休復 休否

循按休之義同於嘉嘉會合禮謂亨也乾二先之坤五乾四次之坤初先五次初其序不亂傳於大有贊云順天休命大有二之五成同人爲乾二之坤五之比例四之比初應之卽乾四之坤初之比例乃乾二不之坤五而四之坤初成復不可爲仁不可爲禮惟變通於姤姤四未之初而復五先之姤二爲元吉則仍不失爲休命也故云休復否九五休否與休復同泰孚否泰二之五爲元吉而否四之初應之故大人吉大人謂泰二之五也下文繫于包桑承休否成益

言之

介福 介疾

循按晉六二受茲介福于其王母兌九四介疾有喜
馬融皆訓介爲大而豫六二介于石馬作拊解爲觸
小石聲鄭康成作砢爲磨砢虞仲翔作介爲織介繫
辭傳贊介于石爲介如石崔憬解爲如石之耿介通
測之介福介疾之介卽介于石之介介之義爲畫
亦爲副豫先成萃次成咸則取義於副成咸則止而
四不之初又取義於畫三副五而有艮石亦卽畫止
於石故云介于石艮爲石石有止義介亦有止義故

云介如石。晉上之三成小過。與小畜上之豫三同。故需二先之。晉五而後。晉上之三爲介福。不可云受茲介石。而以福字與實受其福並受其福。諸福字明其爲需二之。晉五同於未濟二之五。而用介字與介于石相貫。明其爲成咸四不之初。於是九四卽以鼫鼠與石字貫。晉成咸仍是介于石也。兌成革。艮成蹇。相錯卽旣濟咸。革四不之蹇初。故云介疾。凡成蹇革。則宜以變通爲悔亡。故悔存乎介。乾二不之坤五。而四之坤初。成小畜復。小畜二又不之豫五。而上之豫三。成小過需。成需乃通於晉。而受茲介福。艱難困蹇而

後得故吝存於介吝之介指介福介石而悔之介則通介石介福介疾言之

敦復 敦臨 敦艮

循按敦之訓厚也繫辭傳云安土敦乎仁故能愛乾二不之坤五而上先之坤三成謙三先於五則爲輕輕之言薄也反而觀之則先五後三不輕薄而敦厚矣兌二不之艮五而艮上先之兌三艮成謙與坤成謙同艮成謙則艮不敦艮不成謙先成家人家人又通於解解二之五而後上乃之解三解成咸家人成既濟艮於是乎終是以厚終也故上九敦艮吉解二

不之五而四之初成臨不能无咎卽不能敦臨通於
遯臨成旣濟遯成咸與家人成旣濟解成咸同臨之
敦卽家人之敦家人之敦卽艮之敦傳云敦臨之吉
志在內也家人爲內此指遯爲內明以遯臨之敦爲
家人解之比例經傳皆隱奧而造於微也更明之以
復復六五敦復无悔姤二先之復五上後之復三亦
復成旣濟姤成咸經以无悔二字隱與家人之有悔
相發明艮成家人兌成屯家人悔而通解則屯悔而
通鼎今復成屯姤成遯未爲家人則不必悔而通解
卽以上之復三爲敦復所以明兌成屯艮已成家人

必通於解鼎乃爲敦也傳云敦復无悔中以自考也特用一考字與視履考祥相貫艮成謙輕蔑極矣不可以考祥變通於履輕薄改爲敦厚故得考祥元吉敦復之敦旣同於敦臨之敦而臨遯相錯卽爲謙履取視履考祥之考以贊敦復則履之考祥本於敦厚可知謙得履而敦艮成謙不敦又可知矣於是又贊於剝云上以厚下安宅艮成謙通於履兌成夬則通於剝夬於謙則輕夬於剝則厚謂夬二通剝五而剝初應之成益益又通恆恆二之五而後自上之三是以爲上以厚下成旣濟故安宅也何以知上以厚下指

恒益傳於益初九贊云元吉无咎下不厚事也解二
不之五而家人上之解三成恒則上不以厚下是爲
下不厚因下不厚而有事於益乃得元吉无咎猶艮
成謙而旋於履乃得元吉而考祥也艮成謙則艮不
敦坤成謙則坤不敦艮敦則以家人通解坤敦則以
屯通鼎安土坤成既濟也敦仁變通而體元不已也
仁卽元謂鼎二之五元吉安土卽安貞吉此坤厚所
以載物也爻有等謂之物惟載物乃爲厚德若不先
二五遠以三上爲施轉謂之輕薄不可爲厚故中庸
敦厚以崇禮而復禮乃所以爲仁墨子兼愛則無等

禮則爲薄而已矣。何以知謙之輕對乎坤之厚。繫辭傳贊大過初六云。夫茅之爲物薄而用可重也。重與輕對者也。薄與厚對者也。以薄對重。猶以輕對厚。此非泛言也。由敦復而引申焉者也。復成既濟。姤成咸。先五後三。其敦厚固矣。若姤二不之復。五而上先之。復三復成明夷。姤成大過。則不敦厚而輕薄。與謙同矣。大過下巽爲白茅。不成咸而成大過。所以爲物薄也。用而通於頤。則薄可變而爲重。猶謙通於履。而其旋元吉。亦猶解成恆。爲下不厚。用而有事於益。則爲大作元吉无咎。故大過之滅頂。同於剝之滅下。以滅

下卽不以厚下也。

鳴謙 鳴豫 鳴鶴

循按說卦傳震於馬爲善鳴馬指乾鳴上加一善字謂乾二先之坤五爲善然後乾四之坤初爲屯下震其鳴乃善若乾二不之坤五而四之坤初雖鳴而不善矣豫四之初與乾四之坤初同鳴之不善者也故鳴豫凶謙六二鳴謙貞吉履二之謙五乾二之坤五也履四之謙初乾四之坤初也謙五積善履下震鳴此鳴之善者也故貞吉傳云中心得也與鳴豫志窮互明五未善則志窮五已善則心得非謙五得中則

履下何以有震履二不之謙五而四之謙初則履不成益而成中孚中孚無震不鳴中孚通小過而二之小過五則成益而又鳴故中孚六二鳴鶴在陰其子和之其取於鶴者虞仲翔以離爲鶴與離爲隼同一望文生意卽傳會於鶴爲陽鳥聲聞於澤以爲小過成咸上兌張本亦未切也易之取義在聲音假借鶴從雀聲字與雀爲通借一切經音義雀古文鶴繫辭傳云夫乾確然示人易矣說文冂部引易夫乾雀然雀鶴確三字同雀然示人易則鳴鶴之鶴取於變易履失道成中孚不可鳴於謙矣欲其鳴必易於小過所謂鳴鶴在陰

也。謂其鳴也。必霍然在小過之五也。文言傳又贊云。樂則行之。憂則違之。確乎其不可拔。憂謂乾上之坤。三成謙。夫。違謂謙通於履。凡初之四爲拔。乾二未之坤。五拔則成小畜。復與鳴豫同。履二未之謙。五拔則成中孚。明夷。確卽堅也。履二之謙。五爲堅冰。至履二不之謙。五而謙。初拔之履。四成中孚。不堅卽不確。中孚易而通小過。小過初不之四。而中孚二之小過。五則仍確。然而不拔。仍是履二之謙。五之堅冰。至亦卽仍是履二之謙。五之鳴謙。故云鳴鶴。鳴卽鳴謙之鳴。鶴卽堅確之確。而傳以確乎不可拔。贊之明鶴卽確。

確卽堅思而貫之了然無疑

童蒙 童觀 童牛 童僕

循按童之義與子同始生之象也蒙二之五成觀在
蒙稱童蒙謂蒙二之五自未童而期之也在觀稱童
觀謂蒙二已之五成觀由旣童而溯之也夫剝相錯
爲大畜萃夬二之剝五成觀爲蒙二之五之比例亦
卽爲大畜二之五之比例故大畜童牛之童卽童觀
童蒙之童大畜爲鼎四之初之卦鼎本與屯通鼎二
不之五而四之初成大畜失其爲元亨故必改而通
於萃通於萃而二之五成家人乃相錯爲觀而爲童

蒙童觀之比例猶恐不明指出一告字顯與初筮告之告互明所以明其不與屯通而與萃通之義也與屯通則不錯爲觀革無所爲童無所爲告矣此經文之造於微也旅稱童僕何也節二之旅五節成屯旅成遯鼎二之五同則旅四之初爲賁卽鼎四之初爲大畜之比例旅旣成賁而通於困猶鼎成大畜而通於萃賁困相錯爲蒙困二之賁五爲蒙二之五之比例是爲得童僕童而兼僕者僕爲仕於家者之稱通明此得童卽成家人所以明旅成賁與困通也若旅成賁不能變通於困仍以上之節三節成需旅成明

夷不能相錯爲蒙觀則喪童不能成家人則喪童而兼喪僕得童僕則賁成家人困成萃與大畜童牛之告同矣經以一童字爲衆卦之樞紐皆造乎微之微者也

天行 志行

循按傳稱天行者四

乾稱志行者八

少畜升巽屯

天行健

謂乾二之坤五乾成同人同人通師師二之五猶乾二之坤五故同人傳云乾行也謂同人之行仍乾之行健也乾行卽是天行乾二之坤五成同人比坎二之離五亦成同人比同人爲乾行坎行亦乾行也巽

二之震五兌二之艮五不成同人比而成漸隨隨之
通於蠱猶同人通於師傳於蠱贊云天行明震巽艮
兌之行皆乾行也乾二不行而上行於坤三成夬行
不健矣乃夬通於剝而行仍健故於剝贊之云君子
尚消息盈虛天行也乾二不行而四行於坤初成復
行不健矣乃復通於姤而行仍健故於復贊之云七
日來復天行也明姤二之復五夬二之剝五無非乾
二之坤五也然則一言乾行四言天行其義已括天
行者謂六十四卦之行無論由窮而通由反而復凡
合乎道卽合乎天志行者志謂五也二五先行而後

初四三上應之而行。巽傳云：剛巽乎中正而志行。二之震五爲中。上應之成蹇。蹇又變通而正。如是卽爲志行。舉一巽而乾坤六子皆可知也。小畜傳云：剛中而志行乃亨。豫傳云：剛應而志行。兩傳互明。小畜二之豫五爲剛中。上之豫三應之爲剛應。剛應卽剛中而應。如是爲志行。如是爲亨。豫九四傳云：由豫大有得。志大行也。志大行謂志大而後行。志大者豫五大中也。行者三從之而行也。三從五而行是行由五始。故云由豫。凡稱志行者謂由志而行也。屯初九履九四。臨初九皆云志行正。臨二之五而遯上之臨三應。

之遯成咸是爲咸臨臨成旣濟故貞吉與鼎二之五而屯三之鼎上應之同履二之謙五爲履虎尾履四之謙初應之愬愬謂履成益上不之三益上不之三而謙成旣濟故終吉屯臨之志行三上之行由志而始也履之志行初四之行由志而始也志行正者正貞也謂由志行而成旣濟而貞也否九四由泰二之五而行成益則有命无咎否之志行猶履之志行也升二之五而後无妄上之三升成蹇无妄成革故南征吉升之志行猶屯臨之志行也初四三上必由志而行志不行則初四三上卽不可行二五者志也初

四三上四支也。美在其中而暢于四支，則非禮勿言，非禮勿動，非禮勿視，非禮勿聽矣。歸妹九四傳云：愆期之志，有待而行也。謂三之漸上成蹇，蹇初待睽二之五而後行，乃爲志行也。睽傳云：二女同居，其志不同行。乾二之坤五而三上應之，此蹇之志行也。睽二之五而四之蹇，初應之，此睽之志行也。二女指五與三。五離中女三兌少女三從五而行，則爲志行。爲同行，四旣從五成益，則三不得又從五而行，益必旁通於恆。恆二之五而睽三乃從行，睽三與恆五同行，不與睽五同行，故云不同行。推之睽成革而通蒙蒙二之五而初之革。

四應之亦不同行。志行於三上則不行於初四。志行於初四則不行於三上。臨成屯而志行於遯。鼎成遯而志行於屯。亦志之不同行也。志行於三上則爲志上行。晉六三傳云。衆允之志上行也。謂需二之晉三而晉三之上以應之也。若乾成革。坤成蹇。乾四又之坤初。則志行於三上。又行於初四。爲同行。抑乾成家。人。坤成屯。乾上又之坤三。則志行於初四。又行於三上。爲同行。同行則成兩旣濟。故志不可不行。亦不可同行。志不行則志窮。志同行志亦窮也。傳於蒙贊云。匪我求童蒙。童蒙求我。志應也。志應卽志行。惟二五

行而初四三上有應乃爲志行志而不應志不行矣
志行在於承天在於趣時故志行卽是天行亦卽是
時行大有應乎天而時行卽所以志行傳兩稱與時
行過三稱與時偕行益可得而明矣

曰閑 曰動

循按大畜釋文曰音越劉云曰猶言也鄭人實反云
日習車徒困釋文曰動悔音越向云言其無不然鄭
作日閑與虞同然曰動之曰無有異辭曰閑曰動兩
曰字正相呼應說卦傳震動也艮止也閑卽止也萃
上之兌言不動而大畜上之萃三成咸下艮故爲曰

閑曰字指上兌閑字指下艮也困二之賁五賁成家
人困亦成萃賁上不之困三而困四之初則不成咸
而成屯屯下震故云曰動屯家人亢龍有悔故云悔
困二之賁五正爲大畜二之五之比例故以兩曰字
貫之

三就 三錫 三驅 三接 三禡

循按卦有六爻兩卦之旁通者共十二爻動者六不
動者六其所動之六爻兩兩相往來實爲三焉故易
每以三明其義蓋動而至於三則終止欲其終則有
始故於三詳言之乾二之坤五爲一乾四之坤初爲

二乾上再之坤三則終止必以坤之成屯者旁通於鼎鼎二之五而後上之屯三以乾之成家人者通於解解二之五而後家人上之解三所謂田獲三品是也其義師之三錫比之三驅明之師二之五一錫同人四之師初二錫師成屯待鼎成遯而後上之屯三爲三錫比通大有大有二之五一驅比初之大有四二驅比亦成屯待鼎成遯而後上之屯三爲三驅鼎五正位爲王王而後用三驅故云王用三驅王而後三錫命故云王三錫命師二之五成比爲乾二之坤五之比例師之三錫明乾坤之三錫也大有二之五

成同人爲坎二之離五之比例比之三驅明坎離之
三驅也其云三驅依下前禽而言也其云三錫依大
君有命而言也取事之相屬而已比大有相錯爲需
晉師同人相錯爲訟明夷晉彖云用錫馬蕃庶晝日
三接需二之晉五成否上乾爲馬一接也否四之初
錫馬蕃庶二接也益通於恆而後上之三爲晝日三
接也晉之錫承於侯爲錫馬師之錫承於王爲錫命
若不承侯王而錫則爲或錫訟上九或錫之輦帶終
朝三褫之是也訟二不先之明夷五而上之三成大
過一褫也大過四之初成需二褫也需二之明夷五

成兩旣濟爲終朝三禡也。禡荀爽翟元皆訓奪訟成需需二之明夷五次以四之初成益益通恒恒二訟二宜先之明夷五次以四之初成益益通恒恒二之五而後益上之三則爲邑人三百戶无眚益三互坤邑也否四之初戶也上之三人也百亦數之終也不先克三則錫命而不錫鞶帶錫鞶帶則終朝三禡而有眚矣三百戶无眚則不致寇至以奪之矣革九三征凶謂蒙成益而上之三也征凶故貞厲由成益而通恒則爲革言三就有孚革言三就有孚猶云邑人三百戶无眚革本與蒙孚貞厲則革言矣蒙二之

五一就也。革四之蒙初，革成既濟，蒙成益，故貞厲二就也。革上兌爲言，四從蒙五，故革去其言，革言而益。又孚於恆，待恆二之五而後益上之三，三就也。欲革言必有孚於蒙，欲三就必有孚於恆，故革言三就有孚，不孚則爲終朝三褫，有孚則爲三百戶无眚。需晉爲比，大有之相錯，晉彖言三接，故比言三驅以發明之。而又推廣於師之三錫，革之三就，且反明之以訟之三褫，經之自示其例，詳矣。

金矢 金鉉 金車 金夫 金柅

循按說卦傳，乾爲金，凡經稱金皆乾也。井二之噬嗑

五成无妄上乾爲金則得黃金井成需需二變通於
晉五成否上乾則得金矢鼎六五黃耳金鉉黃謂二
之五成遯耳謂上之屯三五坎屯成既濟鼎成咸故
利貞井二之噬嗑五卽鼎二之五之比例井二之噬
嗑五則得黃金井二不之噬嗑五而噬嗑上之三則
滅耳滅耳則不得黃金得黃金則不致滅耳本是互
明鼎二之五旣同於井二之之噬嗑五則得黃金矣
然後以鼎上之屯三則不滅耳而黃耳矣何校則噬
嗑已成頤上又之三成明夷明夷三亦互坎爲耳但
由誅滅而有此耳則爲滅耳鼎先成遯黃中而後屯

三有耳耳由於黃故云黃耳黃則鼎上成乾爲金鉉
卽屬所以貫鼎耳者也上之屯三貫於坎耳之中耳
在此鉉卽在此金鉉二字是申明黃耳二字金由於
黃耳由於鉉也蓋鼎二不之五而上之屯三則爲滅
耳鼎二之五而四之初成家人耳在鼎則爲鼎耳鼎
耳無鉉以貫之但塞而已惟鼎上先有乾金卽以此
金之上九貫於屯三乃爲黃耳卽爲金鉉姤上乾爲
金四之初成小畜小畜下乾爲金小畜與豫繫姤與
復繫姤之巽繩在乾下則復之坤柄在上小畜之巽
繩在乾上則豫之坤柄在下象絲與雙柄相轉旋柅

箕柄也。故云繫于金柅。困成需。旁通於晉。與井成需。旁通於晉。同。晉成否。上乾爲金。下坤爲車。上之三爲矢。噬嗑稱得金矢。困稱困于金車。亦互明也。困賁相錯爲蒙。革困成需。卽蒙成泰。蒙成泰則見金夫。不有躬。金謂泰下乾。泰不孚。否則爲无攸利之金夫。需孚於晉則爲利。艱貞之金矢亦互明也。繫辭傳贊同人九五云。二人同心其利斷金。此指大師克相遇而言。同人上之師三成升。升通无妄。升二之五爲同心。无妄上之三爲斷金。斷金與斷木互明。小畜上之豫三成小過則斷木爲杵。无妄上之三成革則其利斷金。

小畜上巽爲木无妄上乾爲金也

盈缶 鼓缶 用缶

循按缶所以節歌

見說文

鼓之義爲動亦爲鳴

晨雅

坎成屯

而通鼎鼎四不之初而成咸下艮則有所節止是爲

缶離九三稱鼓缶與比初六稱盈缶同盈謂屯也缶

謂鼎成咸也坎六四樽酒簋貳用缶樽酒者坎二之

離五也簋貳者坎初之離四也離成家人坎成屯矣

所謂鼓也卽所謂盈也中孚得敵成需需二之晉五

而晉四之初卽坎二之離五而離四之坎初之比例

成益成屯下皆有震故稱鼓鼓兼二進於五而初四

應之之稱也。納約自牖者，鼎二之五而後上之屯三也。鼎上之屯三爲約，而屯三納之爲納約，牖者明也。鼎二之五則明謂屯三之納約，非遽納也。自鼎二之五而後納之也，是所以用缶也。

簋貳 二簋

循按說文，簋黍稷方器也。坤主受而德方，簋指坤而言也。坎二之離五爲樽酒，樽與尊同。天尊地卑，離成同人。上乾故爲尊，坎二之離五卽需二之晉五之比，例需于酒食，故樽酒也。貳，副也。以坎二之離五爲主，而離四之坎初從之，成屯。屯三互坤爲簋，故云簋貳。

別於離上之坎三從之也。離上之坎三從之。坎成蹇。則無簋矣。惟其成屯。且不欲遽成。既濟也。故用缶。損三五皆坤。五受二。一簋也。三受上。二簋也。損二之五。已用一簋。尙存一簋。不可更用此一簋。蓋損二之五。而咸初四應之。則此一簋宜止而用缶。俟益通恒。恒二之五。而後益上之三。此一簋乃可用。故云二簋可用也。周禮小史注云。故書簋或爲几。鄭司農云。几讀爲軌。古文也。說文匚古文惠定宇謂渙奔其机之机。亦古文簋。渙宗廟中。故設簋。見九經古義渙二之豐五成革。若豐四之渙。初則渙成。益有簋矣。乃豐四不之渙。初而渙。

上之三成蹇上二陽爻渙散矣渙則無所爲簋故必
以革通蒙使蒙成益而乃有簋革蒙相錯爲賁故奔
其机也

致一一致

循按損六三三人行則損一人一人行則得其友傳
云一人行三則疑也三則疑一則不疑矣繫辭傳云
易曰憧憧往來朋從爾思子曰天下何思何慮天下
同歸而殊途一致而百慮又云天地絪縕萬物化醇
男女構精萬物化生易曰三人行則損一人一人行
則得其友言致一也此承上一君二民二君一民而

言咸損兩卦旁通致一。卽所謂一陰一陽也。曰天地
曰男女。曰君民。皆卽陰陽也。二君一民。則二陽一陰。
一君二民。則一陽二陰。不合乎一陰一陽之道。故必
變通。使二陽一陰者。舍陽而通陰。則小人道長。君子
道消。爲小人之道。使一陽二陰者。化陰而爲陽。則君
子道長。小人道消。爲君子之道。於是陰陽兩和。仍合
乎一陰一陽之道也。凡以爲致一也。咸一陽反爲損。
一陰損一陰。復成益。一陽益一陽。反爲恆。一陰恆一
陰。復成咸。又爲一陽。損不成益。而成泰。則損一陰。泰
又一陰。是爲二陰。卽二民也。咸一君。損泰二民。陰多。

陽少故云損一人損一人者不能致一失乎一陰一陽之道也此宜以陰進陽爲君子之道也恆成咸一陽益成既濟又一陽是爲二陽卽二君也恆一民咸既濟二君陽多陰少不可又以咸四之初宜通損爲朋從爾思朋指咸五之陽思指損五之陰陽通陰爲小人之道也君子道長小人道消其義易知君子道消小人道長人或不知故傳詳言以發明之日月相推寒暑相推屈信相感皆以陽不可無陰尺蠖屈所以求信龍蛇蟄所以存身陽貴陰賤陰當承陽陽尊陰卑陰當後陽然不可有貴而無賤有尊而無卑故

貴而无位高而无民則亢而爲窮之災與匪正有眚等自冬至至於夏至若干算自夏至至於冬至亦若干算盈縮相補長短互平一寒一暑卽是一君子一小人同歸者一陰而一陽也恆成成損成益是也殊途者一陽而一陰也咸通損益通恆是也一陰一陽故一致由陽而陰又由陰而陽反復不已故百慮一致卽天地絪縕也男女構精也百慮卽萬物化醇也萬物化生也惟殊途所以百慮惟同歸所以一致致者至也致一而後一致至而一則獨行上下應爲至臨爲堅冰至至而不一則至于八月至于十年而致

寇至矣。君子小人迭爲消長。皆聖人輔相裁成之權。

所寄。君子道長。小人道消。固聖人制之。小人道長。君

子道消。亦聖人制之。傳明以民指小人。君指君子。王

公侯卿大夫令長皆君也。見爾雅廣雅士商農工皆民也。見穀

君爲民之心。見春秋繁露民爲君之本。見左氏傳廿六年傳消長猶云損益

民氣盛則損之。民氣弱則益之。小人道長則君子不

亢。君子道長則小人不害。有報有反。而輕重不畸。一

張一弛。而天下和平。自王弼何晏不明致一之義。以

老氏抱一之說入之。易義遂不明。至以小人道長。君

子道消。爲君子在野。小人在位。說於是執扶陽抑陰

之說者互相傾軋莫不自居君子以所攻擊者爲小人不知聖人裁成輔相之權固不如是矣傳於咸言一致明小人之道而詳之以寒暑日月於損言致一明君子之道而詳之以天地男女陽必通陰陰又必化陽恒九五傳贊云婦人貞吉從一而終也夫子制義從婦凶也恒一陰成咸一陽益上之三從之成旣濟爲從一而終致一乃從一也損一陰成益一陽咸四之初從之成旣濟亦爲從一而終致一乃從一也咸雖通損必損成益咸乃可終爲制義咸雖通損損不成益咸遂成旣濟而終則不爲制義而爲從婦然

則陽雖必通於陰而陰必仍化爲陽乃可從從陽則吉從陽則從一也從陰則凶從陰則從婦也乃從陽必從自陰而化之陽故不云從陽而云從一有一陰而後有一陽也從婦凶婦未生子也婦人卽女夫子卽男男女女構精萬物化生則夫納婦而婦有子是陽通陰陰仍化陽卽爲致一致一者損二至五也從一者損二至五而咸四之初從之也從一而終卽從一而貞故云天地之道貞夫一者也天地卽絪縕之天地天地之道卽一陰一陽之道亦卽君子之道小人之道惟君子小人以消長爲往來乃能致一致一在

陰從一在陽是仍陽貴而陰賤陽尊而陰卑也時行而後休徵恒寒恒雨固爲咎恒燠恒暘亦爲咎陰陽有尊卑而不可有多寡宜和平而不可有偏勝洪範與易正相表裏余於此思之有年不憚詳著之以質諸識者

男廷琥孫授書授詩校字